

漳州府志

卷廿二(廿三册内)

三五公司所藏

ル 5  
3438  
21



門 九 5  
號 3438  
卷 21

漳州府志卷之三十四

列女一 乾隆志卷四十二

史記前漢書不傳列女古人修身道行於妻子端始於夫婦婦教即男職陰統乎陽之義也傳列女自范蔚宗始而後之載筆者不廢焉常則為關雎之窈窕變則為栢舟之靡他禮義廉耻一女子能獨身肩之雖欲不傳何可得哉作列女傳

○唐列女傳

陳氏 林氏

陳氏名性温刺史艷之女將軍元光之曾孫女也適鄭君

漳州府志

卷之三十四 列女一

早稻田大學圖書館  
藏 32.4.16  
藏 書

廸子伯嘉伯嘉溺死性溫自經以從詔旌貞烈

林氏漳浦勤自勵妻天寶末自勵充健兒軍安南及征吐蕃十年不還林為其父母許嫁同縣陳氏將婚之夕適自勵還聞之不勝憤杖劍詣之行八九里暴雨至天晦電明忽見道左大樹有旁孔因避雨孔中聞有人喘息聲驚問之答曰妾林氏女先嫁勤自勵為妻自勵從軍未還父母逼嫁以今夕婚憤恨不從避於宅後為虎所逼至此自勵曰我即自勵也告以故夫婦相持泣頃之虎至自勵以劍揮之虎斃負林氏還家

論曰元光父子祖孫以忠孝世其家載于史乘為郡

帥先今觀其曾孫女以死殉夫匪獨男子賢也門內之教又始基之矣勤自勵之妻林氏艱貞不失伉儷事涉神奇匹婦精誠上通于天需險出穴先否後喜如林氏比者多矣又何疑乎

○宋列女傳

陳氏 崔氏 王氏 史氏 蔡氏

陳氏適許登登家世勲裔弱冠未知學陳氏諫曰席先蔭奈何自墜晨星夜燭勤可進德豈但取青紫耶登感其言遂力學充內庠三領賢書紹興戊辰成進士知興國州北警漸至陳氏曰何不賦歸來共老此生繩先緒固

不在高官也其審於進退如此

崔氏黃彥臣繼室也初彥臣娶陳氏生七子繼娶崔氏生二子凡九子崔氏均愛如一每見諸子必教以忠孝廉勤無爲門戶羞諸子皆奉命惟謹人謂黃氏諸子皆有成立雖彥臣善教而崔氏內助之功亦不可誣云

王孺人漳浦吳與之母也與爲懷安令迎孺人侍奉居官舍日緝絲枲不輟與于廨中治亭臺植花果以樂孺人孺人仍不輟女工與固請毋勤孺人曰吾少而治女事如吾兒治公事之外更復讀書不以爲苦也孺人自與初之官卽戒以蒞官大節令其潔已奉公移孝作忠慎

無貪躁貽母恥辱與宦而學益進所至必有清譽爲福於民孺人有力焉

史氏龍溪顏頤仲子興祖之妻宋相史彌遠女孫也克盡婦道姑病史氏憂形於色日侍左右未嘗離湯藥必躬奉衣裳必躬澣姑沒泣盡哀持喪與葬未嘗踰禮景定元年事聞封孺人號曰孝婦

蔡氏龍溪田家婦熙寧間人其夫日與惡少博徒遊蔡氏屢止之不聽流涕曰汝與是輩游必爲盜久之果夜挈財物歸詰所自來託他故蔡知之力勸改行未幾所與遊夜過夫家挽夫偕往蔡力阻之而止後夜衆復來夫

不告蔡氏與之去蔡奔號聲言欲白之隣保其徒乃散去蔡因勸夫受毆辱者屢矣而持之愈堅未幾諸惡少皆敗露罹罪其夫獨免郡人李大芳爲之傳三槐王聳元城劉安世皆有跋

論曰王氏安石嘗慨晚近士夫多外自藩飾而門內之治不講焉今觀陳氏崔氏王氏之相夫課子史氏之事姑於內則姆教無媿焉彼固一時之高門名媛也蔡氏田家女非素聞禮義之訓者而相夫以正出顛覆而安全之雖高門名媛亦何以加茲

陳氏 林氏 王氏 陳氏 岳氏

陳宜人龍溪人諫議師錫之女御史黃預之妻政和間預以直言忤二蔡貶知邠州宜祿縣卒邠距漳萬里宜人年尙少有欲強委禽者宜人急買舟携幼子扶櫬航海歸舟遇風幾溺若有神物護之及歸辛苦治家以義方教子後子瀟五舉免省解孫樵仲杰樵相繼登科人以爲節義之報

林氏龍溪人年十九適於謝踰年而寡無子父母欲奪而嫁之誓不從乃立嗣以爲夫後守節六十餘載嘉熙間宰趙絳夫爲立石郡守李韶書曰宋節婦林氏墓

淳祐志載  
松齋趙師楷作告文坦庵顏頤仲跋  
竹溪林希逸桃源戴植各有論贊

王氏龍溪人蘓宋傑妻年二十一而寡夫家貧父母欲奪其志時已有娠指腹誓曰生男耶守男生女耶守女父母怒絕其往來既而生男不歸寧者七年孀居八十五歲其後子孫俱以科第顯

陳氏龍溪田家女也家於赤嶺父病藥不能療女年十五默禱於神取心肝爲饌以進父食之愈慶歷間郡倅林有宗名其居曰旌孝坊令傳天驥書其事勒于石

岳氏武穆王女也許配漳浦高登第四子王被收女年尙幼抱銀瓶赴井死世傳爲銀瓶小姐按察梁大用蓋亭覆其井榜曰孝娥劉瑞爲銘略云天柱艱日爲月禍忠

烈父冤莫雪赴井抱瓶泉化血曹江之娥符爾節噫嘻泉可竭名不可滅

前志論曰自陳宜人以下或以節著或以孝傳女德昭矣陳氏剖肝事近不經然近代廣陵婦有割肝療姑者姑婦無恙孝思所極昊天眷佑卒保其身以及其親天人之感未可云誕也孝娥之井遠在臨安因東溪而及武穆松蔦之施俾漳江女士聞而慕效又不可以無述也

○元列女傳

廖氏 黃氏 蔡氏 戴氏 張氏 林氏 陳氏

阮氏 翁氏

廖氏魏亦顏妻亦顏本莆人元初遊漳廖以女妻焉遂家龍溪未幾亦顏卒廖氏方二十四歲子七歲時元初革命宇內騷騷婦姑母子相依爲命轉徙村落間食或不繼里嫗或導其改適者廖氏截髮自誓勤紡績以奉姑教子爲事初終無間大德間郡邑以狀聞詔旌表之

黃氏妙觀潮陽令蔡安繼室也至正丙午安拜官便道過家時陳友定陷漳州安被執與黃氏訣曰此去生死未可期汝能守志爲上不得已當適人黃掩淚答曰烈女不事二夫君何薄妾之甚耶卽剪髮示安安果不返黃

矢志守節洪武十三年有司以聞詔旌表復其家

蔡氏名三玉龍溪陳端才妻至正間盜據柳營江掠其里端才竄去三玉與夫之妹匿神祠中盜入祠斫夫妹見三玉美驅而往與鄰婦同納之舟中欲污之三玉給曰吾衣濕願得更衣而從汝盜往取衣三玉得間投江死越三日屍浮依其父蔡廣瑞舟側廣瑞移舟上流屍亦逆流而上如是者三怪而視之則其女也乃具棺斂以歸福建僉憲左答納失理以聞詔旌表其門

戴氏張氏俱南靖吳氏婦也戴氏爲伯妻張氏爲叔妻伯卒遺孤一其姑喻戴氏改嫁不從已而姑卒叔又卒張

氏母以其產薄亦喻張氏曰嫁張氏曰何者有姑與叔  
在足以撫孤戴氏尚矢不更適今相繼淪沒諸孤俱幼  
吾獨不能效戴氏孀守乎亦遂不嫁時元季多艱民間  
父子兄弟離析而二婦與諸孤卒相保無恙若天道默  
祐然

林氏名佛奴龍溪郭德明妻夫亡林氏方二十七歲父母  
欲有他圖林氏曰婦人從一而終與其改嫁得富而生  
孰若守負得正而死父母義之而止至元丁丑南勝寇  
作城中洶洶皆出外以避或勸林氏行對曰姑適卧病  
若舍姑豈容獨生旣而賊潰姑婦俱無恙避去者咸歎

服焉至正間陳友定入漳州亂兵執其孫惠林氏抱持  
之兵以刀斫其手終不釋兵乃舍去孀居苦節四十六  
年

陳氏名德金字怡情右丞晉國公羅良之繼室也至正丙  
午陳友定據福建發兵攻漳良謂陳氏曰國破身亡理  
之正也吾聞忠臣不顧家汝當自爲計陳氏泣曰婦人  
之義有死而已夫旣與國同存亡我亦與夫同生死豈  
有他志哉城陷良決戰死陳氏投後園魚池中死鄉人  
哀之相與舁葬于綠江之墳時呼爲烈婦塚云

阮二姐漳浦高耿妻耿家貧讀書年二十卒阮停夫柩于



北關外欲葬未能久之外姻竊用火化其夫柩阮驟聞  
奔往火正烈撫心痛哭自投于火中二骸俱燼監邑買  
撤都刺聞而哀之命合葬於北門外樹碑於道勒曰烈  
婦阮氏與夫同亡之墓

翁氏名壽安長泰縣令朱瑱之妻瑱文公六世孫也甫之  
任三日以公事入亂寇卒起攻城瑱不得歸城陷翁氏  
方盛年二女俱及笄有美姿度不能免因戒女曰女以  
貞潔為守寧死義不可辱長女先赴井死次女繼之賊  
急扶以出則長女股已折矣翁引刀自刎死賊相顧駭  
歎因全其子鎬焉

論曰元世以節烈傳者九人皆因寇亂以成名其所  
遇亦足傷矣然不至是則節烈不彰仁者不以盛衰  
改節義者不以存亡易心此曹令女之言也聖人復  
起豈能易之南靖吳氏一門有兩令女焉異哉蔡氏  
遇盜能以智完其不滓之身從容沈淵既死猶以尸  
依父舟不忍離爛爛不亡可謂神也已

○明列女傳

陳氏 張氏 林氏 陳氏 洪氏 王氏 蔡氏

陳太孺人鎮海人適贈文林郎黃嘉卿即少詹事道周母  
也孺人父五世為諸生家雖貧不徙業孺人通四書及

諸小部史顧不喜為庸兒誦說惟教諸隣舍女緝績孺  
人行十數女子從之稱壺師兒曹或懶不讀書見輒廢  
食歎曰人生既不能希聖希賢已是恨事何況廢學當  
是時有議廢聖像者孺人聞哀慟縞素三日兄弟咸詫  
異孺人云吾累世讀夫子書不覺情痛非為異也晚家  
益貧謀入山躬耕諸鄰女老媪攀號累日及行送至數  
十里乃反天啓四年道周迎往京師既膺封羸數金道  
周請為外祖立祠孺人堅却之曰內氏未立廟豈得遠  
問外家又三年卒年七十九平生不妄受一錢嘉卿常  
為人解紛人感其德歲暮矣饋羊一牽孺人遣還之夜

繫其門而去常云女子不紡績男子不詩書而坐得一

錢者便是辱人賤行也其廉介如此

採石齋女  
集補入

張氏漳浦盧煩妻司徒盧維正子婦也父一棟平和人故  
姚守張幼而慧從父之官父斷獄張比擬能得其情父  
大奇之年十九歸于煩煩豪公子也張以禮相莊無褻  
容二十而煩卒舅姑旋沒有族子涎其家暗中為覆巢  
毀卵之謀張獨力支持先事豫防卒保其孤平居孝敬  
勤儉動止皆可法崇正十二年直指路振飛上其事得  
旨旌表黃道周為作節孝序年九十三卒

林氏龍溪黃友立繼室友立初娶王氏生子雲及一女而

卒林氏繼之爲人恭慎慈惠撫前子女無異已出前女  
嫁于楊一日歸寧念其母哭不止林氏與之偕哭前子  
雲徙居新村距所居東山十里許或報曰雲病時日已  
西亟走視之及至見無大病乃歸喜曰吾今夜安寢矣  
所生子熒登進士爲四川按察副使念母老乞歸林時  
年九十餘矣

陳氏洪氏俱海澄學正周一陽子婦也陳適周學樂洪適  
周學射學射從父任盱江邁疾卒又三載而學樂亦卒  
二氏同庚同室各捐簪珥勤紡績侍奉舅姑洪氏課子  
嚴孤起元發憤起家進士卽死于魏璫者也清修苦節

前後相映時論美之

王氏海澄魏統妻事姑至孝夫卒子呈鑄甫三歲叔有違  
言氏乃徙依外家賃草舍以居課兒學兒稍懈輒自刺  
其掌血淋漓兒爲驚奮比呈鑄補邑諸生氏乃歸故居  
營夫葬事而終老焉所坐紡績處終歲不差寸許人至  
起離坐慰勞之比去輒還坐如初其貞靜如此年七十  
餘邑令梁兆陽旌之

蔡氏潤石字玉卿漳浦少詹事黃道周繼室也幼讀書能  
知大義嘗與其姊割臂以療母疾及室道周善事姑以  
孝聞益淹究古今事通性理道周廷杖繫獄玉卿寓書

謂大王明聖不日霽顏語不及私迨道周督師出關復致札云自古忠貞豈煩內顧身後之事玉卿圖之道周既死乃使其長子偕門客之江南得齒髮以歸葬之北山墓側雖流離播越不脫衰絰與從子第言不踰閩晚卜居龍潭素食二十載卒時年八十三玉卿善臨池代道周作行草幾奪真嘗偕北上舟中臨衛夫人帖人爭以匹錦售之然皆署道周名晚年乃自署亦不輕與人也所著詩文多不自傳僅得其寄鄭母及憤慨數章

論曰史載壺範稱山南崔氏河東柳氏為盛觀道周之母陳太孺人際家門亨泰之日開子孫忠孝之先

其異世而同揆者乎自張氏以下諸人皆節婦而以母儀著焉者也讀書明大義課孤子成名起家加完貞自潔者一等矣蔡氏玉卿以皓月清霜配道周碧血未乾之正氣長齋繡佛有托而逃世徒據其墨翰多之不亦淺乎

- 雍氏 李氏 林氏 劉氏 邱氏 林氏 盧氏
- 陳氏 陳氏 李氏 吳氏 鍾氏 陳氏 陳氏
- 江氏

雍氏長泰黃伯英妻年二十七而寡男方九歲舅姑俱老雍氏市餅辟鱸以奉甘旨鄉有水磨磨者以先後至為

序雍氏携幼男持豆往磨有強暴廖仲絃後至奪而先之雍氏號哭磨爲之不旋絃曰水弱也益堰水以激磨水怒下如雷磨終不旋衆驚趣仲絃出豆雍氏下豆磨旋如初咸詫謂節孝所感孀居三十餘年無玷洪武二十六年詔旌表

李氏龍溪莊士因妻名淑明夫死不嫁姑患風痺敬養不怠姑沒貧未能葬正統己巳寇掠鄉里淑明服衰麻擗踊號慟盜憫之過其門不入鄉人相率助營葬焉

林氏龍溪鄭濬哲妻字懿敏年十六歸于鄭二十五而夫亡堅守無二志姑陳氏年老性急或一飯稍遲輒恚不食懿敏能委曲以順適其心孝敬不衰年七十四卒

劉氏名稚字德馨鎮海人適漳浦書生蔡珙珙客死劉氏時年二十餘聞訃慟絕欲以身殉翁姑勸之曰吾兩人老矣惟若能孝婦存卽兒存矣乃從命立孤飲食衣服皆從十指中出晚年置田若干畝以奉先祭曰夫志也未亡人緩須臾死敢不勉承以壽終後曾孫大壯登科元孫宗禹登第奕世簪纓繩繩不絕云

邱氏漳浦鎮海李春元妻與姑蔡氏被擄賊索賄欲鞭其姑氏泣訴以身代賊怒拽欲殺之氏俛首就戮顏色不變賊感其孝竟釋其姑

林氏長泰蔡德和妻也家貧事舅姑能致孝舅有疾隆冬思食竹笋多方購得之姑病瘧家貧乏薪火以身爨之繼又病癰親為之吮其瘡姑沒泣血幾絕後以夫非辜罹獄飲恨不食十餘日死時夏月忽隕霜鄉人哀而奠之者數百人

盧氏南靖陳文開妻文開死盧年二十五矢志守節隣失火將及其家姑樞在堂盧拊樞大慟欲與俱焚火旋滅所居無恙

陳氏南靖林伏豸妻年二十二而寡足不踰閭姑病癰默禱願以身代自吮其瘡及舅姑沒家有九喪未舉林枯

据萬狀卒歸窀穸享年七十餘

陳氏南靖王保民妻性茹素好善樂施年三十夫亡寡居事姑備極孝謹姑死親扶柩至宅兆視窆畢奉木主歸途中三步一拜閭里莫不感動氏無子有服姪寄養他姓贖歸以為嗣後孫毗登第官叅政咸稱節孝之報云

採邑志補入

李氏平和張國材妻年二十五夫歿姑老而喪明自傷婦當改適無所依李氏矢志與姑同存亡善事之終其身年八十

吳氏平和生員陳士選妻士選早有時名食餼十年屢躡

塲屋苦學病羸卒家徒四壁吳年二十七孝養繼姑姑性卞急吳承之以婉順撫一子克繼儒業

鍾氏海澄吳廷輿妻也年二十六夫歿值歲饑父母勸以改嫁氏死拒之事繼姑盡孝姑歿翁老疾侍養尤謹撫夫第二孤女恩同已出守節三十二年而卒

陳氏詔安懸鐘所高尚賢妻也十六歸于高善事姑提甕出汲孝養備至尙賢沒陳年甫二十五育女三遺腹男一念姑在弗忍死欲無死則家貧無以自存旦夕飲泣爲人傭績以養姑姑亡窮無措鬻女以殮富室慕其賢淑將委禽不能奪其遺腹子欽亦以孝聞

陳氏海澄林瀾妻也適瀾三載瀾卒男纔二歲陳誓死不嫁事繼姑李氏尤孝時大疫姑染疫病篤陳日侍湯藥不離側及姑沒俗忌疫傳染臨尸不敢哭陳氏獨哀奠如儀竟與孤子俱無恙人以爲孝感年六十七有同旌其門

江氏海澄人嫁張思濂思濂羸疾死江年方十八無子而翁姑老忍死以事翁姑值倭寇之亂翁繫焉江氏罄貲托所親詣賊贖翁歸家益貧江氏矢志益堅撫五歲姪爲夫後翁姑以壽終負土葬如禮已乃壅夫虛其右爲已壙守節三十七年鄉人相率投牒舉節孝江氏悲感

累日遂得瘵病卒亡何巡按檄禮其廬併給月廩江氏已前卒事寢

論曰昏禮厥明贊見婦於舅姑行盥饋之儀昭婦職以教孝也三代之隆婦職修家道成無以孝婦書者不勝書也以爲居安處樂宮事弗承安望夫遭患難幽憂而稱未亡人者乎自雍氏至江氏凡十有五人皆苦節而以孝顯者觀其所處之艱如人沈痛在身顛連恂聳旁人觀之不知將何以寧忍而處之恬然死而後已在臣爲忠在婦爲節女子節與孝俱猶丈夫忠與孝兼也次于節婦烈婦之先以爲立人之道盡是矣

陳氏 涂氏 黃氏 周氏 柯氏 林氏 鄭氏

胡氏 劉氏 黃氏 朱氏 張氏 李氏 陳氏

王氏 陳氏

陳氏長泰李德淵妻年十九喪夫遺腹四月生男時舅姑與夫三喪未葬陳艱苦拮据襄事孀居六十餘載年八十終洪武三十四年旌表

涂氏龍溪王廷思妻廷思父彝郡孝子也嘗教諸孫女事舅姑當以涂爲法年二十三廷思卒柩停在堂忽溪水暴漲舅携二孤走高亢地以避涂不離柩旁立水中一



晝夜已而水落無恙孀居積淚兩眼成疾正統間有司上其事于朝旌表之

黃氏名坤貞南靖林輝祥妻年二十二而寡守節撫孤子性聰領鄉薦官司李黃年七十一終成化十五年旌表周氏龍溪陳子容妻幼讀孝經小學能知大義二十五夫喪守節訓子親課誦讀後子浚以貢授博羅訓導宏治十四年詔旌其門

柯氏南靖陳宗妻年二十四宗亡遺五孤子柯守節撫孤後各成立以子昂太常少卿誥封太安人成化二十三年旌表仍賜墓祭

林氏漳浦舉人徐輔妻輔北上道卒林年二十有八撫孤藻成人娶婦周氏而藻又沒遺孤棟甫三歲姑婦矢志相依無間言嘉靖四年縣奉旨建坊曰雙節

鄭氏龍溪顏波妻年二十四而寡舅姑繼沒門有五喪鄭盡鬻其產殯葬之年七十餘始終一節嘉靖十四年旌表

胡氏漳浦蘓可教妻年二十二可教應試溺死胡躡號江濱籲天求之至三日得夫屍抱而親沐慟哭欲絕遺孤民俊甫六月胡忍死育孤絕跡歸寧暮功之親不得見其面後民俊成進士授戶部主事疏陳母節萬歷二十

二年奉旨建坊旌表

劉氏漳浦沈汝棟妻事舅姑孝敬年二十二夫疾朝夕籲天以身代及亡慟絕數次欲殉舅姑強止之爲夫立嗣家居不踰房閭雖至親鮮覩其面年七十餘終萬歷二十六年旌其門

黃氏龍溪蔡一清妻年二十夫亡子方六月事舅姑以孝聞六十歲完節終萬歷三十一年奉旨旌表

朱氏平和張珍偉妻年二十四稱未亡人養姑撫子茹荼五十餘年孫士良乙未進士天啓五年巡撫題旌節孝張氏龍溪庠生謝珊之妻珊妙齡早寡值族人寇亂多艱

百計存孤訓子及孫崇正元年以孫宗貴請旌表建坊李氏南靖許思謙妻十八歲于歸甫三月而寡將殉之念姑老矣小叔雖幼顧可俟以繼夫後也爰坐臥一室謹事姑後叔生子乃取以爲嗣崇正三年旌表

陳氏鎮海衛林雨濩妻年二十而寡家貧惟一女矢志守節父母憐之依外家終其身崇正十年旌表

王氏漳浦林琥妻年二十七夫亡慟不欲生姑止之曰高堂垂白遺孤未有死而置此豈曰慈孝乃惟命堅守事姑食貧艱苦萬狀子文貴博士孫偕春翰林檢討上其事于朝詔建坊年八十三卒

陳氏漳浦劉養大妻年二十四夫卒遺孤五月欲以身殉  
 諸母曰如舅姑與五月子何乃已亡何盜起鄉人竄避  
 陳以死衛夫柩盜亦尋他之舅姑沒拮据喪葬其訓孤  
 不獨任慈曰所以哺子人飴我茶人乳我血後子廷蕙  
 成進士詔旌其門

論曰夫者婦之天也事所天之道豈有窮乎一與之  
 齊終身不改殷斯勤斯鬻子之閔以為未亡人之道  
 盡矣又有能達于義以一女子而擔人春秋窶窶之  
 事者如陳氏之葬三喪鄭氏之葬五喪傳曰都邑之  
 士乃知尊禰學士大夫乃知尊祖婦人而有賢士大

夫之識尤可尚也守節者門內之貞操旌閭者縣官  
 之殊典錄陳氏十六人天章彤管互相照耀既已聲  
 施後世矣而于陳氏鄭氏表而出之使人知事夫之  
 道在於紹志述事庶死者復生生者無幾微憾也

- 黃氏 林氏 顏氏 陳氏 魏氏 陳氏 胡氏
- 陳氏 林氏 張氏 黃氏 謝氏 李氏 林氏
- 陳氏 蔡氏 趙氏 石氏

黃氏龍溪康居祿妻居祿卒時黃年二十六男方四歲誓  
 不復嫁奉舅姑鞠孤子節操凜然洪武丙辰夏五月雨  
 暴下平地水高數丈居民漂溺黃升屋呼天水為之殺

舅歿悉鬻產以葬食貧終其身

林氏名淑瑤龍溪貢士莊同妻同赴京卒于途林年二十  
五子弼僅週歲姑有季女贅婿于家偏愛之迨淑瑤他  
適且奪其子乳乳他人子又虐使自費以困之淑瑤飲  
泣茹苦二十餘年既而季女及婿皆暴亡弼幸長成淑  
瑤母子乃即安壽八十五終

顏氏龍溪舉人汪範妻天順癸酉範領鄉薦癸未會試掣  
顏氏以行其年塲屋災焚死舉子九十三人範與焉顏  
氏于灰燼中求得夫屍具棺殮獨身護喪南歸葬故山  
姑徐氏已老顏年稚子幼矢志不二守節年八十餘終

陳氏名杏姐龍溪黃覃恩妻恩卒陳氏年二十四繼姑過  
之嫁夜自經以救獲甦遺腹生子舅老病泄痢七年氏  
躬為浣滌奉饋粥湯藥始終無倦色正德丙寅山寇至  
揮刀斫其舅氏以身翼之臂傷血注神色弗變謂賊曰  
寧殺我勿怖我舅賊義而釋之嘉靖間子宗繼與姪二  
人皆為賊所掠氏令人贖金先釋二姪次及其子鄉人  
上其事於有司旌之享年九十卒

見良村節孝錄

魏婉龍溪顏士朝妻十八歸于顏二年而士朝卒遺腹方  
四月或勸其改適魏怒曰吾夫讀書志學古人吾寧死  
不忍貽吾夫之辱也昕夕躬蠶績以奉舅姑月吉則焚

香籲天願減已壽乞生男爲夫後彌月果生男泓讀書好禮克世其家孫櫛領鄉薦人以爲節義之報卒年七十有八

陳氏龍溪舉人江汝松妻夫歿時年二十三生子思孝甫三日母諷改志陳指孤泣曰江氏四世遺此而已斷髮自誓事姑甚孝謹姑歿停柩值洪水暴漲終夜守柩立水中號天大慟水爲之退年五十四卒有司表其門曰節孝

胡氏龍溪陳珣之妻也年二十而嫁方娠夫死哀而絕食誓不獨生女婦勸之曰孕五月矣若生男陳不絕祀非然死未晚也胡乃祝曰陳宗絕乎女也吾死之不絕當生男旣而生乃男也家貧薄胡不辭艱難撫孤陳以不絕縣令蔡承甲旌之年九十三卒

陳氏漳浦林聰妻少寡守二子有強隣凌鏢之乃悉棄田宅歸依母兄家母兄勸之嫁不從編茅爲屋荆棘塞蹊拾斷穗採草根爲食長子忽病目盲陳呼天叩禱目明如初後元孫一陽策先後成進士世以文學甲科顯林靈金平和張志穆妻穆娶鄭氏生二子靈金繼室也夫卒氏年二十七所生子方六歲姑適之嫁加以箠楚無完膚終不易志及姑卒哀毀盡禮躬爲營墳併前妻塋

焉後三子皆成立相友愛忘其爲二母

張氏詔安林彥珮妻彥珮簽解皮料銀到京遇赦免解盡散其金還鄉里里人義之彥珮死氏年二十五以舅姑在死守自誓舅姑歿負土爲墳十指盡出血苦節六十年以壽卒方歿賊猝至鄉人驚竄子大輅獨護喪號泣頃颶風作賊舟畏而遁去人謂孝節之報云

黃氏詔安楊敬妻二十三而寡語以改適富家則痛哭誓曰妾有腸全副不可轉夫有孤三週可垂後又幸家有園二畝可療饑安適爲自治其圃常廢午炊篝燈紡績以教其子卒年七十有二孫觀吉進士

謝八娘海澄江光彩妻光彩家貧遠商萬歷癸卯呂宋會戕殺華人無數光彩死焉八娘聞訃欲絕姑及祖姑慰之曰有遺腹在萬一產男祀可勿斬也閱三日果男茶苦備嘗育懷孤兒至于成立祖姑及姑後先營葬皆襄事焉

李氏海澄柯喬清妻喬清商于饒州卒李氏年二十六聞訃哀慟絕食七日翁勉慰之乃復食孤子挺尚幼兩叔傲悍皆耽耽視藐孤數諷其改志李終不爲奪嚴氣正性自持門戶課挺力學舉京闈第一成進士李以子貴封孺人年八十終

林氏海澄周士達妻隆慶庚午士達以儒士赴省試溺死  
林氏時年二十九歲欲自往求屍水濱舅姑尼之林痛  
毀欲自經者數矢志撫孤三十餘年不出戶庭孤尚德  
領鄉薦年六十二終學使者旌其門曰貞節

陳氏海澄林瞻曦妻十六于歸嫻婦道人稱其賢七載夫  
病且篤氏泣曰願相從夫曰死易耳孤幼獨不念貽父  
母憂乎氏嚙指出血以撫孤成立爲誓旣畢婚忽一日  
疾作召孤曰吾願已畢下報爾父無庸藥石爲也遂卒  
蔡氏海澄陳大貫妻也適大貫五載婦道備至夫爲族豪  
凌毆嘔血卒蔡誓同死自縊者數矣小姑輒防護解救  
且勸曰死易立孤難嫂獨不念乎乃止家貧紡績供衣  
食課子通經逢夫忌辰必出血衣號慟如初喪有司表  
其門曰苦節以壽終

趙氏海澄陳一韓妻也一韓署遼州城陷巷戰死焉有孤  
曰耀曦方稚趙聞訃大慟而縊姑救之得不死乃勸以  
存孤趙氏受命卽撤去家僮僅留一嫗曰余寡婦也不  
可以男僕供使令課耀曦非祭祀不許出及耀曦登賢  
書趙氏病將尋醫辭曰余事畢矣死生命也吾死報汝  
父復何恨哉蓋寢疾數日而卒

石氏海澄人嫁李任祿夫死遺孤世奇小過必朴曰昔若

母今若父矣若母負我使我負而父迨世奇官庶常欲以苦節上聞母愀然曰婦事夫猶臣事君適際其難分所當為何節之有且爾幸通籍于朝天之報我不薄矣若復受旌人將謂以庶常之母旌非旌庶人苦節之妻也若官果顯其求庶人妻之苦節者以闡潛德可耳年九十四卒

論曰允處顛沛而不失其正者未有不明乎死生之說內外之分者也趙氏及見其子成名病而不服藥曰死生命也吾將下報爾父石氏子既貴顯而不欲以若節上聞曰分所當為何節之有至哉言也雖古

先哲之無所為而為何以過之備錄黃氏已下諸人以盡窮嫠所遭之變而變而不變者乃其心之一為之聆趙氏石氏之言則居可知矣

- 黃氏 韓氏 魏氏 林氏 陳氏 楊氏 陳氏 施氏
- 戴氏 張氏 陳氏 陳氏 馬氏 許氏 高氏 連氏
- 李氏 郭氏

黃氏龍溪陳景育妻年二十而寡父母欲奪嫁之黃斷髮自誓卒遂其志子國華娶韓氏年二十四而國華亡孫道元娶魏氏年二十八而道元又亡自祖姑及孫婦三世俱守貞不貳魏氏有二子時二姑尚存拮据百艱慈



孝兼盡陳氏祀賴以不絕者三節婦之力也人稱其門曰三節

林氏龍溪黃世承妻年二十四世承沒子巨新甫二歲林以栢舟詩人自矢事繼姑錢氏惟謹資紉績以給衣食後巨新又早亡媳陳氏年二十六亦矢志孀守姑媳兩寡形影相弔歷五十餘年林氏八十九陳氏六十八閭里號曰雙節黃門

戴門三節婦者漳浦戴體周媳也體周三子長敬仲娶楊氏次敬琳娶陳氏次敬和娶施氏楊氏年二十嫁三十寡陳氏十九嫁二十七寡施氏十八嫁二十五寡俱逾

七八十以天年終當是時祚薄門衰弟兄繼歿妯娌各年少失所天楊氏柔閑婦德能以節義倡誓死不渝陳氏施氏相觀而善亦以節義相尚至于白首始終無間奉事翁姑生事壘祭悉合禮論者謂體周之門三子雖淪喪而若存也陳有遺孤曰襄楊與施僅有女各一邑人參議吳起仁為之記刻石以表其節

採吳起仁記補入

戴氏平和李廷仰妻年二十二夫卒撫遺孤思賢中歲入邑庠而歿婦張氏痛夫而死孤孫正心方七歲復為撫養成入焉厥後曾孫宸揚娶陳氏生子不育二十而孀矢志苦節喪葬畢歷二十餘年立夫姪為嗣母子相依

朝夕訓誨以成夫志人稱西山三節婦採邑志補入

陳氏南詔所千戶郭泰之妻年十八而夫亡遺腹生子郭

繼矢志撫孤織紵自給其後繼生子良弼未襲職而沒

良弼子藩襲職未幾又沒弼妻馬氏藩妻許氏並矢志

自勵與祖姑陳氏同守節邑人上其事于郡邑請旌邑

人盧洪聲為郭將軍一門四節歌見藝文按歌云四節中有從容就

義大小許之句則許氏乃死干者且當有二人而邑志記之不詳耳

高氏海澄鍾廷楡妻夫卒氏孀守呱男二人長以勵娶連氏亦早世姑媳相守以至垂白云

李氏海澄江必鸞妻鸞歿李自分必死所親諭以死易立

孤難乃撫子周楫以延一綫比長娶婦郭氏周楫又故

慟弗自勝郭氏慰姑願終身事姑以保餘年姑婦相依

後先完操而終邑令陶鎔贈以穀帛匾曰窮簷雙節

論曰黃氏鍾氏江氏一門雙節苦矣陳氏戴氏李氏

三節郭氏四節益苦矣或謂苦節不可貞諸節婦不

以為苦且相與甘之而士大夫亦交豔慕之以為乾

坤清氣萃於一門也霜霰之後必有陽和若孟陶歐

陽班班可考揆諸節婦初心未必為此張橫渠云富

貴福澤厚吾之生貧賤憂戚玉女于成諸節婦皆稟

精粹之氣以生者知憂戚無異于福澤相與甘之宜

也夫何苦之與有

- 李氏 陳氏 林氏 劉氏 蔣氏 陳氏 韓氏
- 陳氏 杜氏 張氏 鄭氏 王氏 林氏 趙氏
- 鄭氏 曾氏 蘇氏 洪氏 陳氏 鄭氏 黃氏
- 陳氏 葉氏 鄒氏 鄭氏 邱氏 林氏 林氏
- 何氏 陳氏 張氏 陳氏 林氏 張氏 蔡氏
- 鄭氏 黃氏 林氏 蔡氏 杜氏 陳氏 陳氏
- 高氏 曾氏 葉氏 曾氏 羅氏 戴氏 許氏
- 潘氏 曾氏 王氏 蔡氏 陳氏 魏氏 曾氏
- 吳氏 李氏 陳氏

李氏龍溪民王嘉圍妻也年二十二而寡圍未有子立夫

兄之子璵為後璵復未婚而卒李氏矢志靡他年七十

一而歿 璵妻吳三姐亦自縊死見烈女

陳氏龍溪宋史妻名貞姐史卒年二十有六姑欲嫁之入

室自經過救得不死卒全其節

林氏龍溪方本誠妻名禧永樂八年本誠以事逮入京死

焉禧年十八遺腹生女惟繼祖姑一人在奉養勤勞志

無他適祖姑歿田產悉為族豪所奪乃携孤女依父母

以居年七十終

劉氏龍溪王尚友妻名柔嫁一年而尚友歿有衛帥欲娶

之劉以死自誓年六十二卒貞白一節

蘇氏龍溪顏克一妻名宜機年二十而寡自幼讀書能以

禮自持教二子俱成立年六十終

陳氏名正字淑德年十八嫁林瑞儀七月而儀卒持喪哀

毀幾喪明事舅姑盡禮一日登樓見夫遺服傷感涕泣

失足而墜家人驚視見墜簪深刺入地而膚體無恙問

之曰恍惚若有所乘而下不自知也孀居七十餘歲

韓氏龍溪徐于海妻二十四而寡生子甫十日毋欲嫁之

欲自投于水火乃懼而止後子歿孤苦無歸鄉人哀之

陳氏龍溪涂華妻名俞二十一歲夫卒男方晬誓不他適

事舅姑孝敬彌篤鄉人稱之曰節老婦

杜氏名從正龍溪綺萬邦妻二十二而寡家貧節縮贏餘

事姑養子而素食終身焉年八十餘卒

張氏龍溪蔡邦禮妻嫁三年夫故家貧具甘旨奉姑自食

麥糜夫族有欲謀害其孤者乃携歸依母家三十餘年

辛苦萬狀孤賴以存

鄭氏字淑潔龍溪蔡顯舉妻年二十二夫卒其父欲奪而

嫁之淑潔出其奩粧衣服盡歸于父不復歸寧孀居三

十七年貞白無玷

王氏龍溪人漳州衛百戶妻夫亡無子妾鐘氏有娠已而

生男王撫育之如已出事姑李氏三十餘年小心敬愛營葬其家四喪嫡庶相守以至歿齒人以爲難子英孫襲職中武利進士

林氏龍溪鄭景政妻二十五而寡從容守節哀不夜哭居一小室勤事紡績以奉姑教子而已孀居六十年始終一節子度領鄉薦

趙氏龍溪楊常興妻夫亡年二十二子尚幼矢志不嫁勤紡績治生計以富家好善樂施有偉丈夫器度夫從弟廣爲曲江令未仕時予之資產以成其志時流賊鄧茂七等沿掠鄉村相戒不入其室依萬歷癸丑志改正

鄭氏龍溪蔡朝靜妻年十七孀居爲人傭績撫孤誓不他適母陰受聘焉鄭斷指長號竊自縊夫女弟往救之得不死守節而終

曾氏龍溪陳文滔妻年二十四而寡子甫週歲孝姑課子孀居五十餘年卒有司爲立貞節坊

蘓氏龍溪陳汝賢妻年二十七夫亡履看縊賴姑高氏救免守節七十四歲卒督學宋儀望旌其門

洪氏龍溪蔡應魁妻適蔡三載夫亡遺腹生男與姑相依姑歿哀毀盡禮自孀居後足未嘗至父母之門年七十卒

陳氏龍溪郭士侗妻踰年而侗卒遺腹生男復殤陳屢欲

自決以舅姑寬慰之忍弗死妹適于謝其夫亦歿相勉為栢舟靡他之節竟以哀致歿卒年三十二郡邑為上其事

鄭氏龍溪生員黃宏妻夫亡家徒四壁母氏欲改嫁之斷髮自誓終身不歸姑死躬負土埋葬年五十六卒

黃氏龍溪王虞德妻年二十八夫亡孀居閩內嚴肅不妄言笑鄉族以為楷範年九十一終同安林希元為著貞淑篇

陳氏龍溪楊瑞芳子應辛之妻先瑞芳少孤遭嘉靖季年寇亂事母以孝聞長登武科終養不上公車及歿子唯

辛早卒婦陳氏亦善事姑輕財樂施鄉有頌聲時流賦

梁良劫掠北溪諸村獨楊氏一家相戒不犯人以為兩

世孝節所感陳吏部天定扁其門以表之採邑志補入

葉氏龍溪吳華久妻夫卒家貧甚每得一食必以奉姑冬被無絮抱姑足以身覆之年八十終無怨言採邑志補入

鄒氏龍溪郭伯輿妻伯輿早喪族有利其產者密以氏訂

他姓約婚有日矣以死自誓更遜辭謝其族卒完節焉採邑志補入

鄭氏年十七適龍溪黃格未十年遭舅姑及夫喪流離瑣

尾靡有寧居氏以紡織所入供祭育孤年九十一卒

邱氏龍溪顏光魯妻年二十三而寡母諷改嫁斷髮為誓翁姑喪塋拮据盡禮年六十九卒

林氏龍溪蔡一松妻年二十七夫亡矢志撫孤行年七十有七初終一節

林氏漳浦涂毅妻年十八夫歿遺腹生子已而舅姑繼歿躬營塚墓孀居六十餘年成化間知縣劉璧上其事

何氏漳浦鄭彥明妻年二十適鄭三載夫亡撫前子若已出舅憐其寡給銀四十兩為資用何藏以俟孤成人付之封識宛然孫爾相以歲薦任祁陽知縣

陳氏漳浦徐循介妻年二十四夫亡有遺腹生男潛抱歸父家矢志堅守年六十二完節而終見通志

張氏鎮海衛指揮應襲桂蕃妻蕃為父奏事于京道卒張年二十二子方在乳哀毀守志坐卧一小房人罕見之

陳氏鎮海林裕妻夫死年方二十事舅姑三十餘年始終勤謹身老無歸丐一子畜之以承夫祀

林氏長泰蘓會嘉妻嘉以書算隨使者冊封海外溺死林年十九杜門垢面不為容飾事舅撫孤終身無玷舊志作陳姓

張氏長泰楊佳仕妻二十三歲夫故遺腹一男孀居織紵為業教子就傳壽至百餘歲

蔡氏長泰葉文魁妻年二十三而文魁死遺腹生男呼天

自矢茹荼閔鞠以至成立卒年七十三

鄭氏長泰林鼎輝妻年二十于歸逾年而寡誓以身殉翁為之立嗣氏乃鬻其環瑱覓乳母養之長延師教督時稱賢母焉

黃氏名瑛王南靖陳欽成妻年十八夫故矢志不二孝事舅姑居喪俱如禮嘉靖間郡給粟帛獎之年八十終

林氏南靖陳資偉妻年二十八而夫沒長男漢甫九歲次端在遺腹剪髮絕粒誓不更適二孤後皆成立孫茂馨之婦許氏曾孫女二姐俱以烈死見烈婦

蔡氏南靖許應鴻妻年二十二夫亡撫孤事二親孀居三

十載人無間言

杜氏南靖陳江妻年二十四夫亡矢志自守夫妹陳氏亦寡杜迎之于家與同食息相廸以大義並執節終其身杜卒年八十有九

陳氏南靖吳應魁妻適二載夫喪遺腹生男拮据撫誨皓首冰清鄉人敬之

陳氏南靖鄭宗奇妻年十八夫亡屢絕食不死守節六十載所坐室前有梅一株初冬便着萼殆天所以旌陳節也

高氏南靖許元貞妻年十六適許數月而夫死氏慟曰吾



無難一死祇恐無以立孤傳後耳夫兄感其誠以次子為嗣撫訓有方家貧紡績至有餘供足不踰戶外卒時

年四十一 採邑志 補入

曾氏平和朱明貴妻年二十二守四歲孤士業再世以來

祖姑與姑俱相繼寡居僅延一綫之緒至士業始生四

子其傳乃蕃婦德所致也 採邑志 補入

葉氏詔安人年十八適西林吳同愛不數載夫死屢欲殉

之幸遺腹生男曰吾可無死以存孤也遂謝鉛華勤女

紅足不踰閭者終其身 採邑志 補入

曾氏平和林琦妻琦亡氏年二十三幼孤二乳乳在疚氏

訓誨撫育卒光大其門孫修登賢書 採邑志 補入

羅氏平和庠生曾變妻年二十五而寡家貧寄食外家備

極艱辛勤女工給子讀書誠以勤學子喩門果領萬歷

鄉薦 採邑志 補入

戴氏平和張淵妻年二十五夫亡無子舅姑憐其少欲嫁

之號泣赴水以救免屏居一室足不踰閭雖子姪罕見

其面守節五十年

許氏平和李曰俊妻二十九歲而寡值粵寇張璉作亂世

路艱難以一篋婦持門戶兼課督諸孤篝燈夜讀紡聲

與書聲相聞聞者皆為淚下後諸孤皆孝立孫光熙

成進士猶逮氏之存焉年九十卒黃道周爲之傳探邑志補

潘氏平和張鳳妻鳳卒潘年二十二無子因姊姒白于族人立族子爲嗣躬教督之終身苦節

曾氏平和朱明妻明死年二十二孤僅四歲曾守節撫孤終其身焉

王氏平和林碧玉妻年二十三碧玉卒遺腹生一子遭凶年忍饑寒自守善事舅姑年六十卒

蔡氏平和林樸素妻樸素亡洗棗食貧日向機筐坐撫諸子成家黃道周爲之傳

陳氏平和李宸揚妻年二十而寡以節自矢夫兄隨州知州宸詔爲立後陳朝夕訓誨卒成其志

魏氏海澄黃顯妻顯臨歿與訣魏斷指誓不更適後翁姑俱死于疫躬殮如儀不避凶厲卒年八十九漳浦林楚爲著節孝傳

曾氏海澄蕪鴻節妻年二十夫歿父母強之再適擲石爲誓不復歸寧請于舅姑立嗣終身服不華飾面不滌垢卒年八十有五

吳氏海澄鄭珂妻珂歿水漿不入口姑解之曰婦孕已七月何忍絕其如綫乃忍死以待越三月果男遂撫孤以

老翁姑喪葬皆其襄事邑令毛鴻鳴表其門年七十三卒

李氏名義姑海澄阮紹煌妻年二十二夫歿斷髮誓志終節不渝督學高公旌獎之卒年八十餘

陳氏海澄郭瑄妻年二十二夫亡家貧罄所有殯殮尋值凶荒自廢餐以爲兒食時時哀慟泣血竟喪其明鄉黨義而哀之

前志論曰寡鵠之歌至明而盛其出于窮簷鄙屋者尤多大抵皆因所遇各行其是故有織紉自力養孤成立則節而苦却聘全貞斷膚自明則節而勇受夫遺命終養舅嫜則節而孝守柩呼天水火不避則節而誠遭變逢厄委曲全孤則節而才皆至性奇行名與天壤同流者也間或處窮困或其子姓式微不能自達于官而附見于士大夫之文傳聞于父老之口詳畧不同輒載之如右不忍聽其湮歿云

張氏湯氏

張氏詔安孫信之妻湯氏孫玠之妻信與玠同母兄弟也俱業儒信死張氏誓與夫同死爲父母所持未得間無何玠以哭兄過哀亦病死湯氏私語張氏曰生同事死同歸可乎張氏然之湯氏屢縊家人覺而解之者數次

久且懈矣歲十一月二婦從俗禮佛畢人曰今欲嫁乎  
曰然吾二人嫁必一室人莫測其意張有女屬隣人携  
之嬉戲田間二婦遂沐浴固結衣袵自斷其帶各懷夫  
所讀書一冊抱銅鏡一枚同懸于梁而死直指劉應龍  
請諸朝建坊時有贈聯云妯娌志同歸兩索綱維千  
世界弟兄名不朽一楹提起九原人

論曰世謂烈婦慷慨捐生何張氏姊妹處死之審也  
楚詞云知死不可讓願勿畏兮明告君子吾將以為  
類兮二女子同心殉夫至難割者母子牽依之情張  
氏能斷以義無幾微顧戀相對投繯從容而瞑可云  
無畏矣屈子求同類于千百世後不可知之人二女

子之類近在姊妹間可異也

蔡氏	陳氏	朱氏	陳氏	蔡氏	郭氏	林氏
林氏	許氏	林氏	戴氏	鄭氏	朱氏	林氏
李氏	黃氏	陳氏	許氏	徐氏	陳氏	郭氏
程氏	陳氏	許氏	吳氏	湯氏	郭氏	陳氏
王氏	陳氏	黃氏	方氏	莊氏	魏氏	黃氏
林氏	陳氏	林氏	陳氏	李氏	吳氏	林氏
鍾氏	王氏	蔡氏	林氏	黃氏	蘓氏	蔡氏

蔡氏龍潭人幼習女訓嫁昌森夫亡無子蔡哀毀盡禮日  
坐柩側將葬乃治酒食請姑若母以訣遂自到也邑人

上其事詔特旌之

陳二娘龍溪王從彞妻泉州人歸七日而夫病及故扃戶自縊姑駭救之乃歸泉與母訣母堅止之一日乘間入卧內竟縊死翁姑聞訃往視死三日矣面如生萬歷二十六年旌表

朱氏漳浦張寇期妻嘉靖三十八年倭寇攻埔尾城寇期從城上執矢石禦之被銃傷死朱氏痛夫死義自縊以從知縣劉欽命遣吏致祭請旌焉

陳氏鎮海庠生黃曰勤妻萬歷四十四年以貞烈旌  
蔡氏鎮海郭道膏妻夫亡年二十哭臨三日自縊死事聞

旌表

郭氏龍溪人嫁陳應美七年生一女而夫病故舅本農家貧甚郭自稱貸以葦勤織償前貸餘以事舅且密製殉衣舅諷之改適不應其明年早荒舅復言改志事且與婚者有期郭夜舂且織至鷄鳴往視夫墓慟而歸膝半跪堂上引刀自剄者三舅驚呼諸子赴救而婦瞑矣端坐不食時年二十四萬歷戊申中元日也

林氏名細娘龍溪陳思程妻幼嘗讀列女傳既適陳事姑盡孝思程亡林誓不獨生諸母勸慰之林剪其髮曰髮可續身乃可留至大祥焚其衣裳別製殮服夜半就縊

死萬歷癸卯督學饒景暉旌之

林氏七姐龍溪吳追城妻年十九夫卒茹苦十餘載及子稍成立曰吾志遂矣遂自縊萬歷間巡道程遠旌之採邑志補

許氏龍溪李晉妻晉卒於海外氏設靈致祭卒哭之日自經以殉採邑志補

林氏龍溪霍通妻通以軍籍從戎外死訃至林號哭欲絕勸之者以娠方臨月宜少俟林領之已而婉身得男又數月而喪至哭迎于北郊歸抱兒乳之呼其夫弟曰吾適暈此兒暫寄小郎隨闔戶有墳投縋死矣遠近爭弔之蔣太史孟育為之傳

戴氏龍溪邱孔文妻名祐姐永樂甲午夏孔文暴卒祐姐年方二十哀慟不止服除母欲奪其志不從母密受鄉人之聘祐姐投水而死

鄭氏名順常龍溪吳可贊妻嫁未踰年而贊卒將營葬謂其姑曰乞為雙墳姑不聽以告其父母父母曰汝年尚幼何出此言鄭戚然歸飲藥而死卒合葬焉

朱氏龍溪黃裏誠妻裏誠之京卒于途朱年二十三聞訃哀毀絕粒越數日死

林氏龍溪蔡子善妻夫卒姑欲奪其志一夕自刎死有司

白其事表曰貞烈

李氏龍溪陳漢鳳妻鳳盲其一目一微眇李事之甚恭已而鳳染疾癩人不敢近李朝夕燂湯洗之不懈漢鳳竟死小祥後托言歸寧別諸宗人入房自經年十九殮時面色如生

黃氏名楣漳浦鄭承惠妻嫁三年而夫亡哀號顙天誓以死從越七日哭奠如禮家人不疑潛自縊而死

陳氏漳浦人適鎮海士人康起鳴甫一月夫亡既卒哭母令歸寧哭曰無復歸理矣潛入寢室自縊死

許氏漳浦沈同訓妻嫁三月夫亡哀慟幾絕一日託疾閉室服衰經自縊死時年十九就殮顏色如生

徐氏漳浦陳類妻類故徐氏年方二十誓不再適從容自縊鄉人憫之與夫同穴而葬仍碑其墓

陳氏漳浦詹澣妻澣家貧甚陳事姑孝敬克盡婦道及三年而澣歿鬻嫁衣以資棺斂竊入卧內自縊姑聞奔救之不及矣

郭氏漳浦林作惠妻年二十八夫亡誓以死殉家人防之嚴及塋請于姑曰吾將往視墳姑許之拜哭盡哀即投墳前潭水而死邑令房寰旌其閭

程氏漳浦陳纘妻夫客死高郵程年二十有八訃至號慟

幾絕成服拜舅姑畢入室假寐旋啟視則縊絕於床矣  
萬歷癸卯知縣楊材上其事建坊旌表宗伯潘晟爲之  
傳

陳氏漳浦人年十九嫁夫陸瓊未幾瓊卒舅以室隘移柩  
山陬陳請置卧內不聽明日往視柩慟曰我在而使夫  
暴荒野乎歸自經死

許仕娘漳浦鄒大澤妻年二十五夫亡逾月乘姑視釀於  
他室遂自縊死御史熊相爲立傳

吳尾姐漳浦人鎮海衛學生員黃龍妻龍故抱二歲孤付  
其姑號慟絕食手搯胸五孔皆出血殞時年二十六列

名節義坊中

湯氏漳浦楊鍾宏妻崇正己卯鍾宏病死湯誓以死殉姑  
止之力旣卒哭竟自縊別駕朱某祭其家顏其門曰節  
烈

郭氏名貞姐漳浦許惟長妻貞姐手患痼疾許氏父母欲  
悔之惟長曰誰復娶者入門事舅姑孝敬備至未數月  
惟長卒父母狗俗火葬貞姐投烈火中死鄉人義之爲  
立墳

陳氏名妙姐漳浦張品妻品貌寢妙姐事之惟謹踰年品  
死舅姑憐其少欲嫁之陳以死自誓一日偶拾夫金手



園悲愴不自勝遂飲藥死邑人葉璽為賦梁山高以美之

王京女漳浦人性慧知書年十七適程嗣袞踰年袞死女號哭頓絕復蘇及夫葬自投墻中家人扶掖以歸一日得間梳洗登樓自縊死其衣衿斂具皆已預製有司具其節以聞

陳氏名清藻漳浦施君蓋妻君蓋疾陳籲禱請以身代及沒盡出衣飾以殮之日夜號慟不粒食一日祭畢潛入卧內置履床前家人以為寢也逾時視之則已自縊矣黃氏漳浦蕭哲妻夫卒時年二十六舅姑諷其改適且密

受里人聘將強嫁之黃懇于姑曰亟還聘死不入其門也姑怒黃度不免夜三鼓襁負週歲女趨江潭插竹柱衣自沉死

方氏漳浦虞衡司主事林纘振妻纘振卒于京方氏哀慟絕粒以頭觸柱比旋家曰夫柩還吾可以死矣引笄自刺洞胸流血服除設奠哭柩前嘔血死年二十六巡按御史龔一清徐兆魁並旌其廬

莊氏鎮海衛千戶林華妻華病莊氏罄所有求醫治之弗效華卒僅一女二歲莊氏哀不自勝乃以夫遺業併所生女付伯氏托為撫養夜自經死時年二十八歲

魏氏鎮海鄭洪顯妻夫遭疾將屬續潛縊于樓而死時年三十一歲

黃阿姐鎮海朱賢良妻嫁未踰年而夫亡母張氏諷令改適氏知母不諒已也密製殮具一日晨起梳洗更新衣閉卧房縊死士民呈舉其事給匾旌異

林氏鎮海陳維妻年十八歸陳二載夫亡未蓋棺懷繩登樓自縊死御史何維栢督學田汝成交旌其門

陳氏鎮海鄭嘉猷妻猷病篤誓與同死嘉猷卒當夜就縊以救免絕粒八日竟死事聞撫按立碑旌表之

林氏鎮海衛生員陳美章妻美章病篤林氏割股爲羹以食之竟弗起林氏號慟躡踊有頃絕

陳娥姐長泰王天保妻年十五適天保家貧竭力操作以奉舅姑逾歲而天保暴亡娥姐抱屍慟哭自咬其舌昏仆于地姑救之甦尋自縊死

李氏南靖許文接妻年十九適許逾年而夫病篤氏慟訣曰卒哭必相從也及夫卒恣出家貲以治喪具父母諷之曰守喪非節乎氏曰守固也第翁姑無依則守以盡孝兒子三恃則守以盡慈未亡人無子而有伯叔奚以守爲迨夫卒哭求殮衣于翁翁不與氏曰吾懼死後更衣見體不與新者萬勿更吾故衣也遂絕粒父母知

志決請翁與之紬手製殮衣拜翁姑是夜經于夫死處

初氏行聘時夫家果木俱七月開花結果其盡志以殉

也開結如初焉推官丁此呂為立傳

採邑志補入

吳英姐詔安陳養望妻夫死未卒哭自經于夫之柩側

林月娘詔安許傍妻年十八適許未逾年夫卒月娘朝夕

悲號勺水不人口哀毀骨立三月而卒與夫同窆

鍾尾娘詔安生員胡士麒妻入門舅姑先亡事祖姑以孝

聞士麒家貧教讀于外病革鍾往視之竟死賃舟載屍

以歸蓋棺畢即潛入卧內自縊死知縣梁士楚祭以文

焉

王品姐詔安陳詰妻詰病王減殮積米為市藥費既而詰

死遂自縊家人救之氣未絕踰日乃甦卒哭後竟縊死

蔡氏詔安人嫁夫陳渡海歿蔡氏哀痛不自勝求為夫立

後既卒哭竟自縊先是萬歷間蔡有從姑名克亦殉其

夫時稱蔡氏雙烈

林氏海澄馬鵬振妻振以逆酋變死林聞訃絕粒自經知

縣姚之蘭旌其門曰節烈

黃巽姐年十七適儒士楊堪堪病三載奉湯藥惟謹既而

卒黃登床就縊死

蘇三娘海澄人其夫周某坐罪應戍三娘偕行至建州夫

病歿抱幼子返夫家恐為累不納因投外家日痛其夫一日自縊于蕪園樹下其夜群蟻擁土埋之次早已成墳矣歷二百餘年風雨飄搖而墳土無恙

蔡氏海澄蕪謙妻生二子而夫死欲以身殉念蕪孤呱呱翁姑在不可死也乃矢志守貞父母屢欲奪之氏斷雙目喪其明茹苦數十載及翁姑終孤成立逢夫諱日素服拜奠畢閉戶自經侍婢張氏從氏歸蕪從未抱衾裯感氏貞義相守終身卒葬氏墓側採邑志補入

論曰詩云穀則異室死則同穴又云百歲之後歸于其居無取乎殉夫于屬纊之辰蓋棺之頃也哀之深

則願與同死憫之至則不如無生踴躍飛鳴豈翼而隕小鳥猶然況於人乎其有逼于父母之不諒舅姑之交謫族親之侮余不難一死以完其皞皞之軀昭昭之節彼豈不知國風詩人之義乎誠有所不得已也悲夫

蔡氏 黃氏 楊氏 黃氏 游氏 黃氏 朱氏 黃氏

林氏 蕭氏 許氏 蔡氏 張氏 陳氏 王氏

戴氏 詹氏 許氏 陳二姐 孫氏 王氏 陳氏

楊氏 毛氏 葉氏 許氏 朱氏 鍾氏 蕪氏

蔡氏龍溪人嫁于鄭伯謙年二十九為倭所獲守義不屈

倭怒割其腹甘受極刑可謂能守義矣

黃四娘龍溪人嫁夫李能方十餘日流寇突至家人各逃散四娘為賊所獲入神廟欲污之四娘給曰此地不便天將晚俟夜可乎賊然之行過河自投橋下而卒時嘉靖辛酉也

楊氏漳浦人嫁李氏子夫亡義不再適正統間寇亂被獲至南馬場欲犯之罵不絕口為賊手刃而死

黃氏鎮海陳應科妻嘉靖間饒賊陷城黃氏適歸寧父家父命與俱逃嘆曰賊已盈城逃將焉往既而賊攻其門黃氏義不受辱即投井死其母繼之

游氏鎮海林可貞妻饒賊擄之行過天尊堂投井死

黃氏鎮海生員陳基妻饒賊陷城基持刀抗鬪賊格殺之黃氏痛夫即投井死眾具呈旌獎

朱氏鎮海黃師文妻黃氏涂文妻姑嫂被賊執俱投井死

林氏鎮海翁瑞夫之妻被賊執不屈抱子投井而死

蕭氏鎮海朱簧妻城陷同妯娌許氏蔡氏張氏共繩縊死

陳氏鎮海吳志豪妻聞城陷先投井死

王氏鎮海黃輝妻嘉靖四十年閏五月饒賊襲陷衛城輝出覘賊賊猝至及避賊入室王氏度不免見賊掠戴夫帽痛詈之以手批賊墜其帽賊殺之

事見黃氏家譜

戴氏鎮海衛生員朱鐸妻寇陷衛城戴氏負老姑以行賊欲繫之戴曰吾頭可斷頸不可繫也賊怒砍其頸并欲殺姑戴負重傷翼蔽之曰寧殺我勿殺姑賊義並釋之出城復遇倭寇不屈如初遂見殺

詹氏長泰鄭鴻澤妻嘉靖四十四年倭寇掠其鄉獲婦女甚衆詹獨抱一子坐于田間寇奪其子劫之使行詹唾罵不顧賊抽刀刺其頸而死時年二十八賊相與嘉歎因舍其子寘之近村竟得全

許氏南靖陳茂馨妻嘉靖四十四年饒賊陷城祖姑林年九

十四

卽節婦林氏

病不能起茂馨曾與許氏及女二姐年十四

歲俱侍側不去賊至許氏泣辭茂馨曰吾毋女義不可辱祖姑老矣汝第扶去庶幾可存遂俱投井死茂馨扶林氏賊憐而免之且出其二屍賊退越十日始獲殮面色如生知縣林挺春親爲營塋題曰雙烈之墓督學宋儀望爲立陳氏三節傳仍樹碑表之

孫氏年十六歸南靖訓導曾安邦爲繼室時倭亂山寇遍起抵任之歲賊圍城急孫言于訓導曰君儒官也非有地方寄脫有不測願自爲愛吾則有死而已明年城陷賊執訓導刺之孫度其夫不得免卽赴火死其子三俊哀號伏地賊爲感動相率求孫氏屍付三俊訓導亦不

死事聞撫按厚資給之歸葬于鄉

王三姐南靖李碩果之妻年十七歸于李二年倭寇至被擄投河而死鄉人上其事知縣殷伯固爲文弔之

陳氏南靖王良佐妻正德八年流寇充斥劫掠隣村陳氏畏逼遁至深渡賊猝至自度不免遂投河死萬歷元年以子命爵貴贈安人

楊氏南靖生員王維垣妻沉靜寡言孝事翁姑嘉靖辛酉賊陷城被執欲污之不屈罵賊而死

毛氏詔安懸鍾人嘉靖間海寇曾一本作亂其夫從軍朝發而夕以死氏聞夫之死也痛而哭之水濱俄有一扇

飄飄從海上來氏見之曰吾夫手足也遂赴海死水而有血一圈在死所不散衆咸異之

葉二娘海澄生員林鳳翔妻也年二十八鳳翔病卒二娘事姑孝謹嘉靖三十八年倭入境流賊散掠二娘往同安襄父喪與衆婦避賊涉淺溪猝與賊遇衆婦被執葉獨抗不肯就賊刃其胸二娘大罵曰死賊何不速殺我賊剗其唇吻猶罵不絕口遂死士民上其事巡按杜化中表其門曰貞烈

許氏海澄謝君福妻嘉靖間倭掠濱海君福携妻避難道遇賊追甚急許曰賊急追利妾也得妾必死君君不如

釋妾自全妾死決不出吾鄉可收吾骸福故勇悍左手  
提刀右挾許氏狂走許氏慮并及咬夫指自脫時年少  
美姿容賊擁之去許佯諾度可數百步夫已免厲聲罵  
賊求速殺不得投水中賊引出罵益甚加之刃氏捧血  
塗面賊剗其腹至死罵不絕口

朱氏海澄許光妻鍾氏許瑞妻賊至溪尾先獲朱氏驅之  
去不從殺之并剗其孕繼獲鍾氏被脫追及之亦遇害  
屍碎碎斷里人傷之

蘓氏海澄王大景妻嘉靖四十年避倭鎮海饒賊襲陷衛  
城蘓氏與大景扶姑出奔遇賊死之賊退收殮容色如

生觀察黎元旌其門曰貞烈

論曰風鶴驚而猛士爲之失措鋒刃交而悍夫爲之  
變色又何責于婦人女子乎自戴氏至蘓氏皆遭寇  
亂而能以死明心遂志者假而爲丈夫當天崩地坼  
國破君亡刀鋸鼎鑊以身赴之計不反顧義不旋踵  
奚恤焉論者歸功于明祖開國之初六宮皆以德升  
其亡也君后同殉社稷風教所漸自近而遠漳尤山  
峯水冽烈婦之多不亦宜乎

柯氏 程氏 黃氏

柯三娘龍溪柯乾恭季女也乾恭無嗣生三女長次俱適



人三娘性至孝將及笄父爲擇婿三娘辭曰父母老矣此身適人誰爲養者請終侍勿復言強之則咬指出血不得已乃成其志二親沒年未四十諸母謂曰汝今可以適人矣三娘辭焉年七十九卒其夕有黑雲遶室之異郡守盧璧上其事爲建坊

程瑗姐漳浦庠生程念梅女也念梅孝友無嗣瑗誓不適人以奉二親念梅死痛父弗血食刺血書父行白巡按得祀鄉賢瑗少知書家貧爲女塾師自給名門多禮之以壽終人比之嬰兒子

黃一姐詔安南灣民黃順女也贅夫周景父與夫商于外

母疾篤一姐割股食之隨愈官旌其門曰孝女

論曰載馳許夫人之詩也已嫁而念其父母聖人猶取焉况不嫁而事父母以終其身者乎然聖人終不以此易彼嫁而念其父母事之中也不嫁而終事父母非事之中也而不謂之孝則不可唐陽城兄弟終身不娶昌黎傳之男之不娶猶女之不嫁也天植之隆聞者興起雖其行之過君子無暇責焉耳志黃氏兼志柯氏程氏去古已遠尙有北宮嬰兒子其人者

程氏 蔡氏 葉氏

程氏字阿雲漳浦副使應隆之孫女年十八許字大學士

林鈺之子錚未婚而卒女聞訃悲號兄以他辭慰之女曰此身既已許林豈容或有他志吾其往也乃縞素詣林朝夕哭林之族無不哀者立其姪爲嗣里人王仍縉爲之賦孔雀

蔡氏海澄人字儒士郭顥仰仰故女欲自經家人防之請奔喪不許旣而聞其父許聘于洪遂密縊寢室伯母救之不死父乃還洪聘許其奔喪女撫柩痛哭血下旣卒哭以刀斷其指曰指可續吾更嫁也家長爲之立嗣女終身不復歸寧旌其門曰節烈

葉氏漳浦葉期遠女許配吳維翰翰父天祿以誣陷坐辟期遠耻與爲婚還其聘改許于楊女獨誓死必歸吳期遠在任楊約婚有期矣女投水爲家人所援使聞于維翰母踵宅憫之女聞姑至出拜堂下遂正婦姑之禮與之偕歸林宗伯士章致書期遠以貞女爲賀葉始釋然女與維翰竟偕老

論曰明儒歸有光嘗著論女未廟見而死尚不可謂之婦矧未適人則於夫之恩與義俱無屬也而爲之服奚取焉雖然女子許嫁纓昏禮初昏之夕夫親脫婦之纓則固明以其身許之夫矣猶臣執贄于君君受其贄則固以其身許之君矣未嫁而夫死服夫之

服而終婦之事不欲負其初心也程氏蔡氏葉氏三貞女是已

徐氏 吳氏 黃氏 吳氏 潘氏周氏 吳氏 郭氏

鍾氏 謝氏 江氏

徐氏龍溪民徐侯女許配康元顯顯死女年方十五執所聘釵奔喪父不知所謂女曰既許配即彼婦矣何論適不適耶入門哀哭祭奠坐卧不離柩側將殯密治衾衣一夕自縊于柩側而死萬歷十三年巡撫楊四知題請立廟匾曰完貞

吳三姐龍溪人許字王瑱未嫁而瑱死女衰服奔喪姑李

氏亦孀寡時復有疾乃侍湯藥數日姑稍愈即縊死于

房解其繩端坐不仆直指方元彥題請建坊旌表

按萬歷志

雜記有吳氏女青礁人許聘新埭王以瑱以瑱病女聞之焚香禮斗祈以身代亡何以瑱死女欲奔喪父母阻之遂絕粒不飲食以瑱勞往省之女自陳已志遂與姑偕行哭以瑱塚上歸朝夕修奠及卒哭勺飲不入口者七晝夜伴起晨炊以麻縷自縊死殮時面色如生事與此稍異而邑里姓氏相同不知即三姐否抑別有一人耶附記之以俟考

黃祖姐長泰農家女許配同邑劉志鉉鉉與兄叶昌俱業

儒叶昌入泮名第一鉉弗售爵不得志一日忽自經祖

姐聞撫膺慟哭同室語其母曰從未聞有處女為未謀

面之夫舉哀者毋微言女遂不哭至夜伺二親安枕投

纒殞焉劉備棺衾以婦道殮葬與志鏹同穴從初願也  
詔建坊旌表

吳氏二娘字龍溪劉仲芝仲芝卒二娘奔喪卒哭後縊以  
殉御史聞於朝表門正烈採邑志補入

潘氏許字龍溪林卞卿卞卿卒奔喪哭奠旋自縊以殉有  
司旌其門採邑志補入

周氏正舍海澄兵部侍郎忠愍起元季女也許字漳浦吏  
部侍郎王志道子生員衛世未婚而衛世夭正舍聞訃  
不食六日以殉後起元死璫難建旌忠祠僉以正舍配  
祀焉

吳開姐海澄黃旭燭未婚妻也年十八聞旭燭病革密禱  
身代訃至欲自經父止之曰女子死烈當在夫家此非  
所也遂吞聲收淚促弟往白夫家素帷白燈導之去哭  
奠如儀晨夕坐卧喪側姑知其必死也防之甚周迨卒  
哭成禮會諸妯娌談笑自若防者稍踈遂沐浴整衣就  
縊而死邑令劉斯球親往弔觀者如堵奉旨建坊署曰  
貞烈

郭四娘海澄郭明先之女也許配劉運復甫笄未嫁劉抱  
奇疾四娘減膳毀粧訃至誓以身殉父母防之乘間縊  
死遂合葬嘉靖三十八年也

鍾三娘海澄鍾可久女許配儒士曾省研省研授書歸沒於道鍾聞訃匍往夫家治喪哀毀骨立日不再食既終喪哀淚不輟旋自縊死

謝三娘海澄謝士棟女許配楊應鈞萬歷癸卯應鈞以呂宋之變身歿異域謝氏聞訃欲往奔喪母拒之謝氏號慟移時閉門自縊年十有六邑令姚之蘭屢其門曰正氣天植

江勤姐海澄人許配龍溪儒士郭遯遯病故江持服哀慟累日不食諸親譬解之不能得竟自縊死遂合葬于郭當道旌其門曰貞烈

論曰自徐氏至江氏皆能不負其初心者也鞠子成家則爲貞從夫地下則爲烈其義一也

黃氏 丁氏 蕪氏 吳氏 張氏

黃二姐龍溪人府學生元陽之女也初元陽與舉人林煉相友善許配煉之次子夔時年各幼交相乳哺後元陽家日替未幾煉亦故夔遂背盟別娶二姐聞之矢志不二兄東昇欲訟之官二姐泣曰訟吾夫是訟我也夔聞感愧以金二鎰懇別嫁二姐曰吾志必死何以金爲繼而求婚者踵至母兄婉諭改適二姐撫父柩哭曰幼曾見乳于林母長曾拜見于夫翁不幸見棄何顏別適遂

自縊于父柩之旁同知李畿嗣為葬于馬岐之左表其墓曰貞烈

丁大娘龍溪人丁椿之女饒寇流劫年方十六未嫁也與父偕逃遇賊驅之去不從賊愛其色温言慰之大娘投

水死

採邑志補入

蘓氏漳浦蘓攀妹賦欲犯之罵不絕口賊支解焉

採邑志補入

吳貞姐漳浦吳可法女年十五未許配嘉靖初海賊突至與其父俱被擄上船賊欲犯之唾罵不從賊曰我欲室女貞姐給曰父在別船當聞之賊移船近父遂跳入海屍浮水面數里不沉鄉人祭之江滸

張氏鎮海衛千戶張明女也衛指揮王瑤有二子長聘杜氏富室也次聘張未幾長子死反以次子改續杜氏張女年十九矣明仇瑤欲為死鬪女聞之私謂其母曰貧富人之常情貧乏無往而不見棄勸父勿以女故重自傷閉戶自經死衛人卽墓所為立石題曰貞烈

論曰黃氏張氏遇人無良而死死而不辱其身者也丁氏蘓氏吳氏遇盜而死死而不辱其親者也黃氏張氏可以無死一憤樂死其如歸擬之古丈夫其申徒狄之徒歟介子山之徒歟



